

## VANZELI PAR UN POPUL

Ai ultins di avrîl, i predis furlans des tre diocesis di Udine, Gurise e Concuardie a tornaràn a cjatâsi pe tirce volte a Aquilee, par une semblee de Glesie Furlane. Il tema al è ce che la Glesie e pò dî a di un popul taramotât par dentri e par fûr, cence mancjâ a di un dirit di fonde par sei crodude e scoltade e amade de nestre int.

O publichìn, chi, il comunicât finâl de semblee dal an passât, che la Segreterie de semblee lu veve mandât ancje par talian ai nestrîs gjornâi e che nissun nol à volût publicâlu, di nissun partît. Nancje i “independents”, che si sa benon di cui che e dipent la lôr independence.

No par fâsi viodi bieî ma par mostrâi a la lôr int che Diu nol lasse mai il gjalinâr cence gjâi, i predis a disin, in non dal vanzeli, chest.

### COMUNICÂT FINÂL DE SEMBLEE DAI PREDIS DAL FRIÛL Aquilee, ai 26 di genâr dal 1978

Tignint il cjaveç de semblêe dal an passât e viodint la robe cemût che bol, nô predis des diocesis dal Friûl (Concuardie-Pordenon, Gurize e Udin), dâts dongje liberamentri te nestre seconde cunvigne in Aquilee ai 26 di genâr dal 1978, o sin adacuardi su chescj ponts:

1. Sburtâts dai timps che gambin e ancje dal taramot, nô o crodìn ch'al è necessari vuê fâ une riflession su la storie dal Dogme te nestre Glesie locâl e ancje su la storie dal sô ordinament, convints di cjatâ in chest un spiel di pastorâl plui che une maniere fiscâl di aministrâ.  
Dome rifletint su lis sôs lidrîs, la nestre Glesie che e à vude une sô originalitât – no studade! – tal interpretâ e vivi il Dogme, e savarâ viergisi a dut ce ch'al ven dal forest, cence però pierdi la tramontane e la dignitât.  
E cussì e savarâ ancje dâsi chei metodis di azion catechistiche, pastorâl, liturgjiche e amministrative che le fasin fedêl a Diu e dutune cul nestri popul.
2. La nestre Glesie dal Friûl, sintintsi fedêl a Crist e ai Apuestui tal non di Aquilee “MARI”, e je convinte che no si à di confondi la religjon cu la politiche, ma no si pues però nancje separâ la religjon de vite, fintremai tal so aspjet pulitic; e che si à di impegnâsi pe justizie e pal ben de int, vuardantsi dal lassâsi scjafoâ di chei che a doprin la Glesie in non de politiche.
3. Come predis che a cirin la veretât des robis vuê, o tornin a bati che nô no sin par principi, cuintri i partîts e i nestrîs sorestans, però o volìn jessi une vuaite e un segnâl pe nestre int, visâju e sveâju e difindiju ogni volte che interès, glesiastics o civîi, ju cirin par doprâju.
4. Il taramot al à zontât a lis disgraciis di prime, chês di dopo. O fasìn nestrîs in dut ce che a àn dite e che a intindevin di dî, la letare di Nadâl dai predis dal Taramot de diocesi di Udin e il document di chei de diocesi di Concuardie-Pordenon te semblee dai 3 – 4 di genâr dal 1978.  
O volìn dome puntualizâ, achì, la spine ch'o sintìn simpri di plui, tai rivuarts de ricostruzion:  
Chesta spine e vûl dî:

- cualchidun al volarès che i paîs a nassessin cence muse;
  - i beçs che o vin di vê no rivin;
  - la voe di fâ de nestre int e ven sejafoiade cun cantins che a fasin scrupulâ dome mâl;
  - lis grandis ditis statâls a son in vuaite come il cjaçadôr cul gneur;
  - i sorestans comunâi a doprin il misurin par dâ licensis di fâ sù;
  - lis leçs a son injustis, parcè che a son fatis a pueste par che la int no lis capissi;
  - no si dâ la pussibilitât al privât di fâsi la cjase e ce ch'al covente a so misure, stant che dut al è za programât dal alt.
5. Ai aministratôrs des comunis – che o intindin che sedi int nestre – ur domandin che a vedin l'ambizsion di servî prime il paîs che no cualchidun altri; e in chest câs o invidin ducj i predis a dâur ancje plui di une man.
  6. Al clero dai paîs sparagnâts dal taramot o domandin – se no lu àn za fat – che si informin su la situazion e che la fasin lôr.
  7. Une peraule su la culture: che nus dedin chê universitât volude de int (chê des firmis!); la lenghe furlane, slovene e todescje te scuele e tai ufizis; i dirits tai puescj di lavôr che ogni stât ch'al vûl passâ par democratic al scugne tignîsi in bon di rispietâ sicu dirit uman.
  8. E che si spalanchin in non de gjeografie, de storie, culture e de religjon condividue par tancj secui tal Patriarcjât di Aquileèe, i confins dulintor; e che lavôr e cumierç a puedin sflorî tal Friûl, almancul une volte, pal ben nestri e no, come simpri, pal profit di altris.